

103

SOALAN NO.: 49

**PEMBERITAHUAN PERTANYAAN BAGI JAWAPAN LISAN**  
**MESYUARAT KETIGA, PENGGAL KELIMA,**  
**PARLIMEN KETIGA BELAS**  
**MAJLIS MESYUARAT DEWAN RAKYAT**  
**23 OKTOBER HINGGA 30 NOVEMBER 2017**

**PERTANYAAN : LISAN**

**DARIPADA : DATO' SRI DOUGLAS UGGAH EMBAS**

**TARIKH : 20 NOVEMBER 2017 [ ISNIN ]**

**SOALAN :**

**Dato' Sri Douglas Uggah Embas** minta **MENTERI PERUSAHAAN PERLADANGAN DAN KOMODITI** menyatakan secara terperinci perkembangan dan pencapaian Council of Palm Oil Producing Countries (CPOPC) setakat ini.

**JAWAPAN :**

Tuan Yang Di-Pertua,

Untuk makluman Ahli Yang Berhormat, Kerajaan Indonesia telah meratifikasi *Host Country Agreement* (HCA) pada 11 September 2017 dan dengan ini Sekretariat CPOPC beroperasi secara rasminya di Jakarta, Indonesia.

Sekretariat CPOPC telah menganjurkan *Inaugural Ministerial Meeting of Palm Oil Producing Countries* (IMMPOPC) di Bali, Indonesia pada 2 November 2017. Lain-lain negara penanam sawit yang turut menghadiri mesyuarat tersebut ialah Colombia, Guatemala, Nigeria, Papua New Guinea dan Thailand. Mesyuarat tersebut yang telah dipengerusikan bersama oleh Encik Darmin Nasution, Menteri Koordinasi Perekonomian, Republik Indonesia dan YB Datuk Seri Mah Siew Keong, Menteri Perusahaan Perladangan dan Komoditi, Malaysia merupakan satu platform bagi membincangkan isu-isu penting dalam pembangunan industri sawit.

Mesyuarat tersebut telah bersetuju untuk melaksanakan aktiviti-aktiviti berikut:

- i. bekerjasama dalam mempromosikan imej positif mengenai minyak sawit, termasuk mengadakan dialog bersama pihak-pihak berkepentingan;
- ii. menganjurkan program bagi meningkatkan produktiviti dan kebajikan pekebun kecil;

- iii. menganjurkan seminar bersama untuk menjelaskan perspektif kelestarian biofuel sawit; dan
- iv. menubuhkan Jawatankuasa Kerja dalam bidang-bidang berkepentingan bersama bagi memperkukuhkan kerjasama di dalam sektor sawit.

Selain daripada itu, Malaysia dan Indonesia akan bekerjasama di bawah kerangka CPOPC untuk menangani isu-isu berkaitan kempen anti minyak sawit dan lain-lain halangan perdagangan termasuk menyuarakan bantahan terhadap tindakan Parlimen Kesatuan Eropah yang meluluskan Resolusi ke atas Minyak Sawit dan Penyahhutan Hutan Tropika.

Malaysia berharap dengan permulaan operasi CPOPC ini, akan memantapkan kerjasama negara-negara penanam sawit dalam membangunkan industri sawit serta memperkasa kebajikan pekebun kecil sawit.

Sekian, terima kasih.